

1,000 berkunjung ke Pameran Reka Cipta UMP

Lebih 1,000 pengunjung pelajar Institusi Pengajian Tinggi (IPT) dan sekolah-sekolah sekitar Kuantan berkunjung ke Pertandingan Reka Cipta & Inovasi anjuran Universiti Malaysia PAhang (UMP) di Dewan Astaka, UMP Gambang pada 4 Oktober 2010 yang lalu.

Menurut Pemangku Pusat Pengajian Berterusan & Pembangunan Profesional (CENFED), merangkap Pengerusi Pertandingan Reka Cipta & Inovasi 2010, Tuan Haji Jamil Basri, pertandingan yang bertemakan "Inovasi untuk Kehidupan" ini bertujuan meningkatkan kesedaran tentang kepentingan pemikiran kreatif dan memupuk budaya inovasi di kalangan masyarakat khususnya pelajar sekolah menengah hingga ke peringkat IPT.

Pada pertandingan itu, sebanyak 70 projek penyelidikan dari sekolah menengah dan IPT dipamerkan bagi merebut gelaran anugerah khas yang membawa pulang wang tunai sebanyak RM 1,500 bagi peringkat IPT dan RM 1,000 bagi peringkat sekolah menengah.

Tambah beliau, pemikiran kreatif dan budaya inovasi perlu dipupuk ke arah penghasilan kekayaan, penjanaan ilmu dan kesejahteraan masyarakat.

"Kreativiti dan inovasi sangat

memerlukan masyarakat yang mempunyai keberanian untuk melakukan perubahan kerana pemikiran kreatif diperlukan untuk mencapai status negara maju menjelang tahun 2020.

"Penilaian akan dibuat berdasarkan kreativiti dan inovasi yang menarik bagi setiap penyertaan," katanya.

Antara peserta yang terlibat ialah Universiti Teknologi MARA (UiTM) Shah Alam, UiTM Jengka, Institut Kemahiran Mara (IKM) Beseri, Kuala Lumpur Infrastructure University College (KLIUC), Maktab Rendah Sains Mara (MRSM) Muadzam Shah, Pahang, MRSM PDRM Kulim Kedah, Sekolah Menengah Kebangsaan Aminuddin Bakri, Kuala Lumpur, Sekolah Menengah Vokasional Slim River, Perak dan Sekolah Berasrama Penuh Integrasi Sabak Bernam.

Dalam pertandingan itu, Sekolah Menengah Sains Kepala Batas, Pulau Pinang dinobatkan Best of The Best bagi kategori sekolah menengah dengan ciptaan bertajuk 'Sawit Hero Pencemaran Zero', manakala bagi kategori IPTA dimenangi oleh UiTM Shah Alam dengan kajian bandar masa depan berkoncepkon Bandar Malam di Alor Gajah Melaka.

Sementara itu, Fakulti Sistem Komputer & Kejuruteraan Perisian (FSKKP), UMP dengan

tajuk penyelesaian masalah ruangan parkir menggunakan sistem komputer menang bagi kategori tertutup UMP dan turut menerima Anugerah Khas Dato' Haji Che Wan Mohd Khalid Mohamad, Yang di-Pertua Persatuan Kontraktor Melayu PAhang.

Lain-lain anugerah khas juri adalah Anugerah Khas Pereka Muda dimenangi oleh Sek Men Teknik Tengku Ampuan Afzan, Bentong manakala Sekolah Menengah Teknik (Pertanian) Teluk Intan, Perak menang Anugerah Khas Sains Industri.

Selain itu, Anugerah Khas Booth Paling Mesra dinobatkan kepada Universiti Pertahanan Nasional Malaysia (UPNM).

Tuan Haji Jamil mengharapkan pertandingan yang diadakan setiap dua tahun ini dapat mengalakkan budaya reka cipta di kalangan masyarakat dan mewujudkan perkongsian ilmu dan percambahan idea hasil jalinan kerjasama antara IPT dan sekolah.

Hadir sama Pengarah Urusan Marimas Sdn. Bhd. merangkap Yang di-Pertua Persatuan Kontraktor Melayu PAhang, Dato' Haji Che Wan Mohd Khalid Mohamad, Setiausaha Kehormat Persatuan Kontraktor Melayu PAhang, Rahimi Abd Samad, Ketua Sektor Pembangunan Kemanusiaan Jabatan Pelajaran Negeri PAhang, Jaafar Idris dan pengurusan UMP.

